

# ጳውሎስ ፕሊሲሲዮሳ አሳው ፃፊዳ ኪታ ጌሉዋ

ጳውሎስ ፕሊሲሲዮሳ አሳው ፃፊዳ ኪታይ ፃፊቴዳዌ፣ ማቀደኒያ ጊዲዋን ዳዒያ ሮሜን አሞዴቴዳ ፕሊሲሲዮሳ ጌቴቴያ ጋዲያን ዳዒያ አማኒያዋንቱሳ። ሃዋንቱ ጳውሎስ ኮይሮ አማንሴዳ ሺሺዳዋንታ። ኡንቱንቱ ሮሜ ጋዴ ዩሌታ ጊደ ዲራውኔ ቃሰካ ካሬ ጋዴ፤ ዩዳ ዋጋኒኔ አማኑዋን ዳሮፕ አዪና። ጳውሎሳ ቦላን ኡንቱንቱ ዳሮፕ ሃንቅቴዳ ጋሱካ ሃዋ (ኪት 16:20)። ሃ ኪታይ ፃፊቴዳዌ፣ ሃራ አማኒያ ኦሳንቻቱ ጳውሎሳ ቆፋ ጳልቂ ጳልቂዳ ዋዪሲያ ዋዲያናኔ ፕሊሲሲዮሳ አማኒያዋንቱ ጊደን ዴንዴዳ ዋርደ ቲሚርቴያ ጋሱዋን አ ዋዛናይ ዳሮ ካዮቲዳ ማዔዳ ዋዴኔ ቃሾ ጎሊያን ኢ ዳዒያ ዋዲያና። ጊደሺን፣ ጳውሎስ ዩሱሲ ኪሪሰቶሳ ሚኒሲዳ አማኒያ አሳ ጊዴዳ ዲራው። ሃ ኪታ ቦላን ቆንጨዳ ቤቴያዌ ናሺቻኔ ኩሜንላ አማኔቲያዋ።

ጳውሎስ ሃ ኪታ ፃፊዳ ኮይሮ ጋሱ አ ሜቱዋ ዋዴ አ ማዳናው ፕሊሲሲዮሳ አማኒያ አሳይ አሞታ አው ኪቴዳ ዲራው፣ ኡንቱንታ ጋላታናሳ። አ ቦላንካ ኡንቱንቱ ቦላንካ ዲማ ዲማ ሜቱ ጋኬዳዋ ጊደፕካ፣ ኡንቱንቱ ፃላና ማላኔ ኩሜንላ አማኔቲዳ ዳላና ማላ፣ ሃ ጋኬቴዳ ኢንጂያን ኡንቱንታ ማንሴሴ። አዩዋኔ ኦቶሩዋ ዲጊዴ፣ ዩሱሲ ኪሪሰቶሳ አሺኬቴላን ኡንቱንቱ ኩማና ማላ፣ ሚኒሲዳ ኡንቱንታ ሃሳዩሴዳ። ዩሱሲ ኪሪሰቶሳና ኢቲፕ ጊዴዳዋን ኡንቱንቱ ዳሜዳ ዳዑ ያሳ አጾ ከካቴላፕ ፑልቴዳዋኔ ኡንቱንቱ አማኑዋን አኬዳዋ ጊዲያዋፕ አቲን፣ አዩሁዳቱዋ ዋጋቱዋ ፖሊያዋን ቤቴዳዋ ጊዴናዋ ኡንቱንታ ሃሳዩሴ። ዩሱሲ ኪሪሰቶሳና ኢቲዋ ጊዲዳ ዳዒያ ኡባቶ ያሳይ ኢሚያ ሳርቴላባኔ ናሺቻባ ኡንቱንቱሲ ፃፊ።

ሃ ኪታይ ኤሬቲያዌ ናሺቻ፣ አማኔቲያዋ፣ ኢቲፕቴላኔ ኪሪሰቲና አማኑዋኒኔ ዳዑዋን ሚኒዳ ዳዒያዋ ጌሺዳ ቤሲያዋና። ሃዋ ቦላካ ጉጂዳ፣ ጳውሎስ ፕሊሲሲዮሳን ዳዒያ አማኒያ አሳቱዋ ሰቂያ ዋልቃማ ሰቂዋ ቆንጨሴ።

**ሺምፓቱዋ ኡባቱዋሲ ኢሜቴዳ ቃንላ ቆፋቱዋ**

- ጌሉዋ (1:1-11)
- ጳውሎስ ደዌዳ ደዑዋ ሃኖታ (1:12-26)
- ኪሪስቲና ደዑዋ ሌሚሱዋ (1:27-2:18)
- ፃሞቶሳሲኔ ኤጳፊሮዲቱሳሲ ደዒያ ቆፋ (2:19-30)
- አማኑዋ ኤቁቴያዋንቱፔ ናጌታና ማላ ኦዴቴዳዋ (3:1-4:9)
- ጳውሎስ ፕሊ.ጲ.ሲ.ዮ.ሳ አማኒያዋንቱሲ ሺሼዳ ጋላታኔ ማቁዋ (4:10-20)
- ዉርሴላ ቁቴያ (4:21-23)

ሳርታ

1 ኑኒ ዩሱሲ ኪሪስቶሳ ኦሳንቻቱ ጳውሎስኔ ፃሞቶሲ፡ ኪሪስቶሳ ዩሱሳን ደዒያዋንቶ፡ ፕሊ.ጲ.ሲ.ዮ.ሳ ጊያ ካታማን ደዒያ ጌሻቶ ኡባቶ፡ አማኒያዋንታ ካሌሌያዋንቶኔ ማዲያዋንቶ ሃ ደቢዳቢያ ፃፊቶ።

2 ኑ አዉዋ ያሳፔኔ ጎዳ ዩሱሲ ኪሪስቶሳፕ ኦጾ ከካቴላዪኔ ሳርቴላይ ሂንቴንቶ ጊዶ።

ጳውሎስ ዋሴዳ ጋላታ ዋሳ

- 3 ታኒ ሂንቴና ሃሳዪያ ዋዴ ኡባን ታ ያሳ ጋላታይ።
- 4-5 ሂንቴ ኮዪሮ ጋላሳፔ ሃኖ ጋካናው፡ ሚሺራቹዋ ቃላ ኡዲያዋን ታና ማዴዳ ዲራው፡ ታኒ ኡባ ዋዴ ሂንቴንቶ ኡባው ናሺቻን ያሳ ዋሳይ።
- 6 ቃሲ ሂንቴንቱ ጊዶን ሎዖ ኦሱዋ ደሚዳ ያሳይ፡ ኪሪስቶሲ ዩሱሲ ሲሚያ ጋላሳይ ጋካናው ፖላናዋ ኤራይ።
- 7 ታኒ ሂንቴንቶ ኡባው ሄዋዳን ቆፓናው ቤሴ፤ አዪሲ ጎፔ፡ ታኒ ሂንቴና ኡባ ዋዴ ሃሳያይ። ሃዒ ታኒ ቃሹዋን ደዒያዋንኔ ዋንጋላው ሞቴቲያዋን፡ ቃሲ ዋንጋላ ሚኒሳ ኤሲያዋንኔ፡ ያሳይ ታው ቃዴዳ ቃዳ ሂንቴካ ታናና ጊሺ አኩዲታ።
- 8 አዪሲ ጎፔ፡ ታኒ ሂንቴና ኡባቱዋ ኪሪስቶሲ ዩሱሳፔ ዪያ ሲቁዋን አይ ከና ሲቁንቶ፡ ያሳይ ታው ማርካ።
- 9-10 ቃሲ ታኒ ሂንቴንቶ ያሳ ዋሲያዌ ሃዋ፤ ሎዖባ አያኔካ ደራናው ሂንቴንቱ ዳንዳያናዳኒኔ፡ ቃሲ ሂንቴንቱ ሲቁ ቱሙ ኤራቴላናኔ አኩካ ኡባና ኢቲፔ ጉጂ ጉጂ ዲጫናዳን፡ ያሳ ዋሳይ፤ ሃቲዴ ኪሪስቶሲ ሲሚያ ጋላሳን ሂንቴንቱ ሱሬኔ ፖኩ ባይናዋንታ ጊዳና።
- 11 ቃሲ ሂንቴንቱ ሺሞፑካ ያሳ ቦንቾኔ ጋላታው ዩሱሲ ኪሪስቶሳ ባጋና ቤቲያ ጂሎቴላ አይፊያ አዪፋና።

ጳውሎስ ቃሹ ዋንጋላይ አካናዋ ዲጊቤና

12 ታናዳን ፆሳ ካሊያዋንቶ፣ ሃ ታና ጋኬዳዌ ሚሽራቹዋ ቃላይ አካናዳን ቱሙ ማዴዳዋ ሂንቴንቱ ኤራና ማላ ኮያይ።

13 ታኒ ኪሪሰቶሳ ዲራው ቃሹቴዳዋ፣ ካቲያ ጎሊያ ናጊያ ኡባቱኔ ሃዋን ዳዒያ ሃራቱ ኡባቱ ኤሪና።

14 ቃሲ ታኒ ቃሹቴዳዌ ኑ አሻቱዋ፤ ዳሪያዋንቱ ጎዳን ሎይሊ አማኔቲዳ፣ ፆሳ ቃላ ያሺ ባይናን ካሴዋ፤ ፃሊዳ ኑዳናዳን ማዴዳ።

15 ቱሙ፤ ኢቱ ኢቱ ቃናቲያ ዲራውኔ ፓሉሚያ ዲራው፣ ኪሪሰቶሳዋ ኑዲና፤ ሺን ሃራንቱ ሎዖ አሙዋን ኑዲና።

16 ሃዋንቱ ፆሳይ ታው ዋንጋላ ናጊያ ኡሱዋ አሜዳ ዲራው፣ ሲቂዴ ቃላ ኑዲና።

17 ሺን ዮኮንቱ ታኒ ቃሹዋን ዳዒሺን፣ ታ ቦላ ዋዪያ አሃናዋ ኡንቱንቶ ማላቲና፣ ባሪና ሲቂያ ዋልቃማ አሙዋን ኪሪሰቶሳዋ ኡዲኖ፤ አቲን፣ ዋዛና፤ ኡዲኪና።

18 አይኔ ባዋ፣ ማላቲሲያ ኡዳኔ ጊዶ ዋይ ቱሙ ኡዳኔ ጊዶ፣ አይ አጊያኒኔ ኪሪሰቶሳዋ ኡዳ፤ ታኒ ሄዋን ናሼታይ። ሲንላናዉካ ቃሲ ታኒ ናሼታይ።

19 አዪሲ ጎ፤ ታኒ ሂንቴንቱ ዋሳኒኔ ዬሱሲ ኪሪሰቶሳ አያና፤ ዪያ ማዲዋን አታናዋ ኤራይ።

20 ታ ዋልቃማ አሙኔ ፆሳ፤ አካና ጋዴ ታኒ ናሼቻን ናጊያ ናጉ አዬ ጎ፤ ታኒ ፓፃ ዳዒናካ ዋይ ሃዪቂናካ ያዬናን፣ ካሴዋዳን ሃዒካ ታ ኩሜንላ አሳቲላን ኪሪሰቶሲ ቦንቼታናዋ፤ አቲን፣ ታኒ ሃራይ አቶ አቲባንካ ዬላቲናን አታናሳ።

21 አዪሲ ጎ፤ ታው ዳዑ ኪሪሰቶሳ፤ ቃሲ ሃዪቂካ ታው ጎዳ።

22 ሺን ታኒ ፓፃ ዳዒያዋን ዳር ጎዒያዋ ኡላናዋ ጊዶ፤ ሃቃዋ ደራኔንቶ ታው ኤራቴና።

23 ታኒ ሃ ላዑ ዬዋቱዋን ሜቶታይ፤ ሃ ዳዑዋ፤ ሻኬታናዉኔ ቃሲ ኪሪሰቶሳና አቲ፤ ዳዳናው አሞታይ፤ ኪሪሰቶሳና አቲ፤ ዳዒያዌ ኡባ፤ አዪዳ ዳር ሎዖባ።

24 ሺን ታኒ ሃዪቂያዋ፤ ሂንቴንቱ ዲራው ፓፃ ዳዒያዌ ሂንቴና ዳር ኮሺያዋ።

25 ሃዌ ቱማ ጊዲያዋ ታኒ ጌሻዴ ኤራይ፤ ቃሲ አማኑዋን ሂንቴንቱ ዲጫናዳኒኔ ናሼታናዳን፣ ታኒ ሂንቴናና ኡባና ፓፃ ዳዳና።

26 ሃዋ ዲራው፣ ታኒ ሂንቴናና ላዒሉዋ ዪያ ዋዴ፣ ኪሪሰቶሳ ዬሱሳና ሂንቴ ዳዒያ ዳዑዋን፣ ታባን ጨቄቲያባይ ሂንቴንቶ ዳራና።

27 ገደፔካ፣ ሂንቴንቴ ሂንቴንቴ ሁጹው ኪሪሰቶሳ ዋንጋላው ቤሲያ ደዑዋ ደዒቴ፤ ታኒ ሂንቴና ባዴ ዋይ ቤዓና ቆዩና፣ ሂንቴንቴ ኢቲ ቆፋን ሚኒዴ ኤቄዳዋ፤ ቃሲ ዋንጋላ ኣማኖ ኢቲ ዋዛና ጊዲዴ ኢቲፔ ባፄቲያዋ ሲሳና።

28 ሂንቴ ሞርኬቴዋሲ ኣያንካ ያዮፕቴ፤ ሄዌ ኡንቴንቶ ኡንቴንቴ ባሻ ጲሺሴ፤ ሺን ያሳይ ሂንቴና ያኒሲያ ዲራው፣ ሂንቴንቶ ኣቶቴላ ጲሺሴ።

29 ኣዪሲ ጎፔ፣ ኪሪሰቶሳው ኦሊያ ቃዳይ ሂንቴና ጋኬዳዌ ሂንቴንቴ ኣኒ ኣማናና ዓላላሳ ገዴናን ኣ ዲራው ዋዪያካ ኣካናሳ።

30 ታኒ ካሴ ባፄቲሺን ሂንቴንቴ ቤዔዳዋ ማላ ባፄኔ ቃሲ ሃዒካ ታኒ ባፄቲያዋ ሂንቴንቴ ሲሲያዋ ማላይ ሂንቴና ጋኬዳ።

## 2

### ኪሪሰቶሲ ባሪና ካዉሺዳዋ ሉሚሱዋ

1 ኪሪሰቶሳን ሂንቴንቴ ደዒያ ደዑ ሂንቴና ዋዛንሉ? ኣ ሲቁ ሂንቴና ሚንጹሉ? ጌሻ ኣያናና ሂንቴንቶ ኢቲፔቴላይ ደዒ? ሂንቴ ኢቲ ኢቲዋሲ ከከቴኔ ቃሪቲቴ?

2 ያቶፔ፣ ሂንቴንቴ ቆፋን፣ ሲቁዋን፣ ዋዛናኒኔ ቆፋ ፖሎዋን ኢቲዋ ጊዲዴ፣ ታና ፖሎ ናሽቶቴ።

3 ሂንቴና ሲቁያዋን ዋይ ጨቁታናው ኮዪያ ማላ ኣሙዋን ኢቲባኔ ኦፕፕቴ፤ ሺን ኢቲ ኢቲዋፔ ጶቃይ ያገዴ ቆፔናን፣ ኢቲ ኢቲዋሲ ሂንቴንቴ ሁጹያ ካዉሺቴ።

4 ቃሲ ኢቲ ኢቲዋ ጎዒያዋ ኮያናፔ ኣቲን፣ ሂንቴንቴ ሁጹ ዓላላ ጎዒያዋ ኮዮፕቴ።

5 ኪሪሰቶሳ ዩሱሳን ደዒያ ሃ ኣሺኬቴላ ቆፋይ ቃሲ ሂንቴናንካ ደዓናው ቤሴ።

6 ኢ ኡባ ዋዴ ያሳ ገዲዴ ደዒዳ፤ ሺን ኢ ዋልቃን ያሳ ከና ገዲያ ማታይ ደዒያዋ ቤሲያዋዳን ፓይዲቤና።

7 ሺን ኢ ባሪ ሺኒያን ኡባባ ኣገዴ፣ \* ኣይሊያ ሚዴታ ኣኬዳ፤ ቃሲ ኣሳ ማላቲዴ ቆንጨዳ።

8 ኢ ባሪና ካዉሺዳ፤ ሃይቆ፣ ኡባ ሃራይ ኣቶ፣ ማሰቃሊያ ቦላ ሃይቃናዉካ ኣዛዘቴዳ።

9 ሄዋ ዲራው፣ ያሳይ ኣ ሎይሲ ጶቁ ጶቁ ኦሌዳ፤

\* 2:7 ኡባባ ኣገዴ፣ ኢ ባሪና ማላ ኡዴዳ ጉሳ።

- ቃሲ ሱንሳ ኡባፔካ ኣጲያ  
ጶቃ ሱንሳ ኣው ኢሜዳ።
- 10 ሄዋ ዲራው፡ ሳሉዋኒኔ ሳዓን  
ሳዓፔ ጋርሳን ዳዒያ ኡባይ  
ዩሱሳ ሱንሳ ቦንቻናው ጉልባታና።
- 11 ቃሲ ኣሳይ ኡባይ ዩሱሲ ኪሪሰቶሲ ጎዳ ያጊዴ፡  
ዖሳ ኣጫዋ ቦንቻ ማርካታና።

**ሃ ሳዓን ዳዒያ ኣሳሲ ፖፖ ጊዲያዋ**

12 ሄዋ ዲራው፡ ታ ዳባቶ፡ ታኒ ሂንቴናና ዳዒያ ዎዴ ኡባን ሂንቴንቱ ታው ኣዛዜቴዳዎዳን፡ ሃዒ ታኒ ሂንቴንቱ ማታን ዳዒና ዎዴካ፡ ሂንቴንቱ ካሴዋፔ ኣሌዴ ታው ኣዛዜታናው ቤሴ፤ ያሻቴላኒኔ ኮርሳን ሂንቴንቱ ኣቶቴላ ፖላናው ኣሊቴ።

13 ኣዪሲ ጎፔ፡ ያሳይ ሂንቴና ባሬው ኤኖ ጊሳናዳኒኔ ቃሲ ኢ ቆፔዳዋ ሂንቴንቱ ኣሳናዳን ሂንቴንቱ ጊደን ኡባ ዎዴ ኣሌ።

14-15 ጌላኔ ናጋራንቻ ኣሳ ጊደን ፖኩ ባይናዋንታ፡ ጌሻቱዋ፡ ያሳ ናናቱዋዳንካ ፖኩ ባይናዋንታ ጊዲቴ፤ ቃሲ ዙዙሜናን ዎይ ኢታባ ቆፔናን ኡባባ ኣሊቴ። ሄ ኣሳ ጊደኒካ ሳሉዋን ፖዒያ ያለንቲያዳን ፖዒዴ፡

16 ዴዑዋ ሚሺራቹዋ ቃላ ኡንቱንቶ ኦዲቴ፤ ሄ ዎዴ ታ ዳቡራዪኔ ታ ኦሱ ሜላ ቆይቤናዌ ኤሬቴያ ዲራው፡ ኪሪሰቶሲ ሲሜያ ጋላሲ ታኒ ሂንቴናን ጨቄታና።

17 ሃራይ ኣቶ ሂንቴንቱ ኣማኑ ያሳው ያርሺያ ያርሹዋ ቦላ ታ ሱላይ ኡሻ ያርሹዋዳን ጉኮፔካ፡ ታኒ ናሼታይ፤ ሂንቴናና ኡባና ኢቲፔ ናሼታይ።

18 ሄዋዳን ሂንቴካ ቃሲ ናሼታናው ቤሴ፤ ታናና ኢቲፔ ናሼቲቴ።

**ዒሞቶሲኔ ኤፓሬርዲቶሲ ኣሌዳ ኦሱዋ**

19 ሺን ታኒ ሂንቴንቱ ዴዑዋባ ሲሳዴ ናሼታናዳን፡ ዒሞቶሳ ሂንቴኮ ኤሌካ ዩዳናዋ ጎዳ ዩሱሳን ኣማኔታይ።

20 ኣዪሲ ጎፔ፡ ሂንቴንቱ ዴዑዋባው ዎዛናፔ ሂርጊያ ኣ ማላ ኣሳይ ሃራይ ኣኒኔ ታው ባዋ።

21 ኣዪሲ ጎፔ፡ ሃራቱ ኡባቱ ባሬንቱ ሁጴ ጎዓ ኮዩዩ፤ ዩሱሲ ኪሪሰቶሳዋ ኮዩኪና።

22 ሺን ናዒይ ባሬ ኣቡ ኦሊያዎዳን፡ ዒሞቶሲ ታናና ኢቲፔ ጊዲዴ፡ ዎንጋላ ኦሱዋ ኦሌዳዎን፡ ኣማኔቲያ ኣሳ ጊዲያዋ ኤሪሴዳዋ ሂንቴንቱ ኤሪታ።

23 ሄዋ ዲራው፡ ታኒ ዬዉ ሃኒያዋ ቤዓዴ፡ ኤሌካ ኣ ሂንቴኮ ዬዳና ጋዴ ቆጋይ።

24 ታኒ ታ ሁጳው ማታ ዋዲያን ሂንቴኮ ባናዋ ጎዳን ኣማኔታይ።

25 ሺን ታኒ ታ ኢሻ ኤፓፊሮዲቶሳ፡ ታናና ኢቲፔ ታ ባጋ ጊዲዴ ኦሌዳዋ፡ ኦሌቴዳዋኔ፡ ቃሲ ታና ማዲያዋን ሂንቴንቶ ከቴቲዴ ኦሌዳዋ ሂንቴኮ ከታናው ኮሺያዋ ቆጋዲ።

26 ኣዪሲ ጎፔ፡ ኢ ሂንቴና ኡባ ቤዓናው ላሞቴ፤ ቃሲ ኢ ሳኩቴዳዋ ሂንቴንቲ ሲሴዳ ዲራው፡ ባሬ ዋዛናን ዳሮ ሜቶቴ።

27 ኢ ቱሙ ሳኩቴዳ፡ ሃዪቂ ኣቴዳ፤ ሺን ያሳይ ኣው ቃሬቴዳ፤ ኣ ዓላላው ገደናን ካዩ ካዩዋ ቦላ ጉጂቴናዳን፡ ታዉካ ቃሬቴዳ።

28 ሰሚ ሂንቴንቲ ላዔንሉዋ ኣ ቤዒዴ ናሽታናዳን፡ ታዉካ ታ ዋዛና ካዩ ኢርዓናዳን፡ ታኒ ኤሌካ ኣ ሂንቴኮ ዬዳና።

29 ሄዋ ዲራው፡ ጎዳን ዴዒያ ኢሻዳን፡ ኩሚንላ ናሽታን ኣ ሞኪቴ፤ ቃሲ ኣ ማላቲያ ኣሳ ኡባካ ቦንቸቴ።

30 ኣዪሲ ጎፔ፡ ሂንቴንቲ ሂንቴንቲ ሁጳው ታና ማዳና ዳንዳዬና ማዲያ ማዳናው፡ ከሪሰቶሳ ኦሉዋ ዲራው፡ ባሬ ሽሞፕዋ ሽኔኮ ገዴ፡ ሃዪቂ ኣቴዳ።

### 3

#### ቱሙ ዓሎቴላ

1 ዉርሴላን፡ ታናዳን ያሳ ካሊያዋንቶ፡ ጎዳይ ሂንቴንቶ ናሽታ ኢሞ። ታኒ ካሴ ዓፊዳዋ ዛሬላዴ ዓፊያዌ ታና ዋዪሴና፤ ቃሲ ሄ ዓፊያዌ ሂንቴና ናጋና።

2 ኢታባ ኦሌያዋንቲ፤ ሄ ካናቱዋ ኤሻይ ዴዒያዋንቲ፤ ቃዓራይ ኮሽ ጊያ ኣሳቱዋ፤ ናጌቴ።

3 ኣዪሲ ጎፔ፡ ኦኒ ያሳ ጌሻ ኣያናን ያሳው ጎዪኒያ ዲራውኔ ኦ ዴዑዋን ጎዳ ከሪሰቶሳ ዬሱሳን ናሽቲያ ዲራው፡ ቱሙ ቃዓራ ቃዓሬቴዳዋንታ፤ ኣሳቴላ ቦላ ኦሴቲያዋን ኣማናኮ።

4 ቃሲ ታው ታ ሁጲያንካ ታ ኣሳቴላን ኣማኔቲያዌ ዴዒ። ኣይ ኣሳይኔ ባሬ ኣሳቴላን ኣማኔቲያዌ ባሬው ዴዒ ገዴ ቆጋፔ፡ ታኒ ኣፔ ሎይላ ኣሳይ።

5 ታኒ ዬሌቶዴፔ ሆሰፕንላ ጋላሳን \* ቃዓሬታዲ። ታኒ ዬሌታን ኢሰራዔሊያ፤ ቢኒያማ ዛሬ፤ ዋላካይ ባዩና ኣዪሁዳ ኣሳ። ኣዪሁዳ ሂጊያ ናጊያዋን ገዴ፤ ታኒ ፓሪሳዌ፤

\* 3:5 ታኒ ዬሌቶዴፔ ሆሰፕንላ ጋላሳን፡ ሃዌ ኣዪሁዲያ ኣቴማ ናናይ ዬሌቶዴፔ ሆሰፕንላ ጋላሳን ቃዓሬቲያዋ ቤሴ።

6 አዪሁዳ አማኖ ሴላ ጊደፔ፣ ታኒ አማኒያዋንታ ዋዪሳዲ፤ ኢቲ ኡራይ ሙሴ ሂጌው አዛዘቲዳ ዪሊያዋ ባጋ ጊደፔ፣ ታናን ፖኮባይ ቤቲቤና።

7 ሺን ታና ጎዲያ ሄ ኡባባ ኪሪሰቶሳ ዲራው ባዬዳዋዳን ፓይዳይ።

8-9 ቱማካ፣ ሄዋንቱ ፃላላ ጊደና፤ ታኒ ታ ጎዳ ኪሪሰቶሲ ዬሱሳ ኤሪያዌ ኡባባፔ ሎይሲ አዲያ ዲራው፣ ኡባባ ታና ሙሉካ ጎዲናዋዳን ፓይዳይ፤ ታኒ አ ዲራው ኡባባ ዬጋ ባሻዲ። ኪሪሰቶሳ ዴማናዉኔ አናና ዴዳናው ኡባባ ዋራ ኦሌዳዋዳን ፓይዳይ፤ ታኒ ሙሴ ሂጌው አዛዘታዳ ዴሚያ ታ ሁጴ ዪሎቴላይ ታው ባዋ። ኪሪሰቶሳ አማኒና፣ ያሳይ ኢሚያ ዪሎቴላይ፣ አማኑዋን ያሳ ማታፔ ዪያ ዪሎቴላይ ታው ሃዲ ዴዔ።

10-11 ታኒ ኪሪሰቶሳኔ አ ዴንዲዋ ዋልቃ ኤራናው ኮያይ፤ ያታዳ ታኒ ታ ሁጴው ሃዪቁዋፔ ዴንዳና ያጊያዋን፣ አ ዋዪያ አናና ዋዪታናዉኔ አ ሃይቁዋን አ ማላታናው አዋታይ።

**ጋኪያሳ ጋካናው ዋዪያዋ**

12 ታኒ ሃዲ ዴማ ዲጋዲ ዋይ ታናን ባሊ ባዋ ጊኬ። ሺን ኪሪሰቶሲ ዬሱሲ ታና ባሬው ኦሌዳ ዋይታ ዴማና ጋይ ኤሌላይ።

13 ታናዳን ያሳ ካሊያዋንቶ፣ ታኒ ሄዋ ዴማ ዲጋዲ ጋይ ቆፒኬ፤ ሺን ታኒ ኢቲባ ኦላይ፤ ታፔ ጉዬና ዴዲያዋ ዶጋይ ሲንላን ዴዲያዋ ኦይቃናው ዋዪታይ።

14 ያሳይ ኪሪሰቶሲ ዬሱሳ ባጋና ቦላ ዴዑዋሲ ዪሲያ ዋይታ አካናው፣ ታ ጋካናው ዋዪይ።

15 ሲሚ ኩኒ አያናን ሚኔዳዋንቱ ኡባቱ ሃዋ ቆፓናው ቤሴ፤ ቃሲ ሂንቱፔ አማራዳዋንቶ አያኒኔ ዲማ ቆፋይ ዴፖፔ፣ ሄዋካ ያሳይ ሂንቱንቶ ቆንጨሳና።

16 ጊደፔካ፣ ኩኒ ሃኖ ጋካናው ዴዔዳ ማራዳን፣ አኔ ሲንላው ሄ ማራ ካሎይቱ።

17 ታናዳን ያሳ ካሊያዋንቶ፣ ታኒ ሃኒያዋዳን ሃኒቱ። ኩኒ ሂንቱንቶ ለሚሱዋ ጊዴዳ፤ ሄዋዳን ሂንቱካ ኩኒ ሂንቱንቶ ለሚሱዋ ጊዴዳ ማራ ካሊያዋንታ አኬኪቱ።

18 አዪሲ ጎፔ፣ ታኒ ሄዋ ሂንቱንቶ ካሴ ጮራቶ ኦዳዲ፤ ቃሲ ሃዲ ላዔሉዋካ አፎፃዴ ሂንቱንቶ ኦዳይ፤ ኪሪሰቶሲ ማሰቃሊያ ቦላ ሚሲማሪያን ጳሺቲዳ ሃዪቁዳዋ ባሬንቱ ሺምፑ ባሬና ሞርኬ ኦሌዳ ዳር አሳቱ ዴዲኖ።

19 ኡንቱንቱ ወርሴላይ ባሻ፤ ኡንቱንቱ ኡሉ ኡንቱንቶ ያሳ፤ ዬላታናው ቤሲያዋን ኡንቱንቱ ኦቶሬቲኖ፤ ቃሲ ሃ ሳዓባ ፃላላ ቆፒኖ።

20 አዪሲ ጎፔ፣ ኑ ቢታይ ሳሉዋና፤ ኑኒ ቃሲ ሳሉዋፔ ያና ኑና ኮሺያ ጎዳ ዩሱሲ ኪሪሰቶሳ ናጌቶ።

21 ኪሪሰቶሲ ኡባባ ባሬፔ ጋርሳን ዋፋናው ዳንዳዪያ ባሬ ዋልቃን፣ ኑ ዳቡራንቻ አሳቴላ ላሚዳ፣ ባሬ ቦንቾ አሳቴላ ማላቲሲዳ አላና።

# 4

## ወርሴላ ዘሪያ

1 ታናዳን ያሳ ካሊያዋንቶ፣ ታኒ ሲቂያዋንቶ፣ ላሞቲያዋንቶ፣ ታና ናሽቺያዋንቶ፣ ታና ጶቁ ኦሊያዋንቶ፣ ታ ዳባቶ፣ ሲሚ ጎዳን ሂንቴንቱ ሚኒ ኤቃናው ቤሴ።

2 ኤዋዴኔ ሲንጻኬ፣ ሂንቴንቱ ላዑካ ቆፋን ኢቱዋ ጊዲዳ፣ ጎዳን ዳዓናዳን፣ ታኒ ሂንቴና ዘራይ።

3 ቃሲ ታናና ኦሊያ አማኔቴዳዋ፣ ኔኒ ሃ ማጫ አሳቱዋ ማዳናዳን፣ ታኒ ኔና ዋሳይ፤ አዪሲ ጎፔ፣ ኡንቴንቱ ታናና ኡንቴንቱ ሱንላይ ያሳ ዳዑዋ ማፃፋን \* ፃፊቴዳ ቃሌሚንፆሳና ቃሲ ታናና ኢቲፔ ኦሊያ ሃራቱዋ ኡባና ዋንጋላ ኡባሳ ጋላናው ዳቡራዲኖ።

4 ጎዳና ሂንቴንቱ ዳዒያ ዳዑዋን ኡባ ዋዳ ናሽቲቴ፤ ታኒ ሃዋ ጉጃዳካ ጋይ፤ ናሽቲቴ።

5 አሳይ ኡባይ ሂንቴንቱ አሺኬቴላ ኤሮ፤ ጎዳይ ማታን ያና።

6 ያሳ ሂንቴንቱ ዋሲያ ዋሳ ኡባን ኦ ሎይሊ ጋላቲዳ፣ ሂንቴና ኮሺያዋ ኡባው ዋሲቴፔ ኣቲን፣ ኢቲባዉካ ሂርሳፒቴ።

7 ቃሲ አሳ ኤራቴላ ኡባፔ ኣጂያ ያሳ ሳርቴላይ ሂንቴንቱ ዋዛናኔ ሂንቴንቱ ቆፋ ጎዳ ዩሱሲ ኪሪሰቶሳ ባጋና ናጋና።

8 ወርሴላን፣ ታናዳን ያሳ ካሊያዋንቶ፣ ሂንቴንቱ ዋዛናን ሎፆባኔ ጋላቲሲያዋ ቆፒቴ፤ ቱማ ጊዲያባ ኡባ፣ ቦንቺሲያዋ ኡባ፣ ባዪዙዋ ጊዳናባ ኡባ፣ ጌሻባ ኡባ፣ ሲቁዋ ኡባ፣ ሱራ ጊዲያባ ኡባ ቆፒቴ።

9 ሂንቴንቱ ታፔ ታማራዳዋ፣ ኣኬዳዋ፣ ሲሴዳዋኔ ቤዔዳዋ ኡባ ኦሊቴ፤ ቃሲ ኑሲ ሳርቴላ አሚያ ያሳይ ሂንቴናና ኢቲፔ ጊዳናዋ።

## ባሬው ኪቴቴዳ አሞታው ጳውሎሲ ጋላቲዳዋ

10 ሺን ዳር ዋዲያፔ ጉዪያን፣ ሃዒ ሂንቴንቱ ታዋ ላዒንሉዋ ቆፓናው ደሜዳ ዲራው፣ ታኒ ጎዳን ሎይላ ናሽታይ፤ ታው ቆፓናው ሂንቴንቶ ኢንጃቴናን ኢዳዳዋፔ ኣቲን፣ ታው ቆፋ ቆፒታ።

\* 4:3 ያሳ ዳዑዋ ማፃፋን፣ ያሳ አሳ ሱንላይ ፃፊቴያ ማፃፋ።



11 ታኒ ሃዋ ታና ሜቲዳ ዲራው ጊኬ፤ አዩሲ ጎፔ፣ ታው ዳዒያባይ ታው ጊዳና † ጊያዋ ታኒ ታማራዲ።

12 ታኒ ሜቶቲዳ ዋቲ ዳዒኔንቶ ኤራይ፤ ቃሲ ዲሬቲዳ ዳዒያዋካ አዩንቶ ኤራይ፤ ሃቃን ጊዲናካ አዉዳ ጊዲናካ፣ ታኒ ካሉዋኔ ኮሻ ቃሲ ፓጫኔ ፓላሃ ታማራዲ።

13 ኪሪሰቶሲ ታው አሜዳ ዋልቃን፣ ኡባባ አላናው ታኒ ዳንዳያይ።

14 ጊደፔካ፣ ሂንቴንቱ ታ ሜቱዋ ታናና ሜቶቲዳ ዳር ሎይሌዲታ፤

15 ፕላይሳ አሳው፣ ዋንጋላ ሚሺራቹ ኮይሮ ሂንቴ ጊደን አዳቲዳ፤ ሺን ታኒ ማቂደኒያፔ ኬሴዳ ዋዳ፣ ታና አማኒያ ሂንቴንቱ አቲን፣ ሃራይ ማዲቤናዋ ሂንቴንቱ ሂንቴንቱ ሁጹው ኤሪታ፤ ቃሲ አሚያባንካ አኪያባንካ ሂንቴ አቲን፣ ሃራይ ታና ማዲቤና።

16 አዩሲ ጎፔ፣ ታና ሜቱ አይቀዳ ዋዳ፣ ሃራይ አቶ ታኒ ቲሴሎንቂያን ዳዒሺንካ ታና ዛሪ ዛሪዳ ማዳዲታ።

17 ታኒ ሂንቴዋ ቦላ ሃራባይ ፑጃታናዋ ኮዩያዋፔ አቲን፣ ዋዩታ ፃላላ አካናው ኮዩኬ።

18 ሺን ታኒ ሂንቴንቱ አሜዳዋ ኡባ አካዲ፤ ቃሲ ታው ፓላሂዳ ጊዲያዋ ዳዔ። ሂንቴ ከቴዳ ኡባባ ኤፓሬሮዲቶሳፔ አካዲ፤ ኮሺያ ኡባይ ታው ዳዔ። ሂንቴ ታው ከቴዳ አሙ ያሳው ሳዉዋ ቶሺኩ ጊያኔ ኢ ደሲያ፣ አ ናሽቹያ ያርሹዋ ማላ።

19 ቃሲ ታ ያሳይ ባሬ ቦንቾ ዲሬቲላ ዳሩዋን ኪሪሰቶሲ ዬሱሳ ባጋና ሂንቴና ኮሺያዋ ኡባ ሂንቴንቶ አማና።

20 ኑ ያሳው፣ ኑ አዋ ሜጲናፔ ሜጲና ጋካናው ቦንቾ ጊደ። አሜንዒ።

**ዉርሴላ ሳርታ**

21 ኪሪሰቶሲ ዬሱሳዋ ጊዲያ ያሳ አሳቱዋ ኡባቱዋ ሳር ጊቴ። ታናና ሃዋን ዳዒያ አሻቱ ሂንቴና ሳር ጊፍ።

22 ሃዋን ዳዒያ ያሳ አሳቱዋ ኡባቱ፣ ኡባፔካ አሊዳ ካቲያ ቁሳሬ ጎሊያን ዳዒያዋንቱ ሂንቴና ሳር ጊፍ።

23 ኑ ጎዳ ዬሱሲ ኪሪሰቶሳ አጼ ኬካቴላይ ሂንቴናና ጊደ።

† 4:11 ታው ዳዒያባይ ታው ጊዳና፣ ታው ዳዒያባን ታኒ ሸምፓይ፣ ካላይ፣ ዋፑ ጋይ። 4:15 2ቆር 11:9 4:16 ኪት 17:1 4:18 ኬስ 29:18

## **Ooratha Caaquwaa New Testament in Dawro (ET:dwr:Dawro)**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Dawro

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 1 Oct 2024 from source  
files dated 29 Jan 2022  
585b63ca-b8e6-55c8-bfef-10bdc95ad69c